



Disediakan oleh : Norsyahiza Hamzah

Program Senamrobik Bersama Tuanku Canselor

Seawal 7.00 pagi pada tanggal 14 April 2004, semua staf KUKUM berkumpul di Kampus Kubang Gajah bagi menjayakan program Senamrobik bersama Tuanku Canselor. DYMM Tuanku Canselor dan DYTM Raja Puan Muda Perlis telah berkenan mencemar Duli berangkat merasmikan program tersebut. Program ini turut dihadiri oleh bekas Speaker Dewan Undangan Negeri, Y. Bhg. Dato' Abdul Azib Saad dan isteri serta YB Pegawai Kewangan Negeri, En. Ismail Othman dan isteri.

Sebaik keberangkatan tiba DYMM Tuanku berdua, acara senamrobik dimulakan dan dipimpin oleh instruktur jemputan, En. Abdul Rashid b. Mahmud. Semua staf dan para jemputan kelihatan ceria sepanjang program ini dijalankan. Di dalam program ini juga turut diadakan upacara penyerahan bendera kepada Kontinjen Sukan Staf KUKUM yang

akan menyertai Kejohanan Sukan Staf IPTA ke 29 yang diadakan di Universiti Kebangsaan Malaysia.

Rektor KUKUM, Y. Bhg. Lt. Kol. Prof. Dato' Dr. Kamarudin Hussin dalam ucapannya memaklumkan bahawa program senamrobik ini adalah program yang dijalankan setiap minggu di KUKUM dan merupakan salah satu platform untuk mengeratkan hubungan sesama staf memandangkan keadaan kampus KUKUM yang teragih. Beliau berharap aktiviti riadah seperti ini berterusan untuk masa-masa akan datang bagi melahirkan staf yang cergas dalam melaksanakan tugas dan amanah yang dipertanggungjawabkan. Seterusnya beliau mengucapkan selamat berjuang kepada Kontinjen Sukan Staf KUKUM dan berharap setiap peserta akan memberikan komitmen dan kerjasama padu dalam setiap acara yang disertai.



KUKUM
SENAMROBIC
BERSAMA
TUANKU
CANSELOR



DYMM Tuanku Canselor, Tuanku Syed Faizuddin Putra Ibni Tuanku Syed Sirajuddin Jamalullail dalam titah ucapan baginda menyeru agar setiap warga KUKUM mengekalkan gaya hidup sihat dan menghindari perkara-perkara negatif yang boleh menjejaskan kesihatan agar kualiti kerja dapat ditingkatkan. Baginda juga mengucapkan selamat maju jaya kepada Kontinjen Staf KUKUM dan berharap KUKUM akan mencapai kejayaan cemerlang dalam acara yang ditandingi.

Program Senamrobik ini secara tidak langsung telah dapat menghimpunkan semua warga KUKUM dalam memupuk semangat setiakawan dan kerjasama bagi membentuk insan yang cemerlang dari segi fizikal dan rohani, seterusnya menyumbang kepada kejayaan organisasi.